

115 年全國語文競賽臺灣原住民族語言朗讀文章 【西群卑南語（原稱：初鹿卑南語）】 國中學生組 編號 3 號

malrazam ta zatu ika'iyana kaninta

nu ulra ziya a trau zuwa veraya kaniyam zatu isalem na kulang, na aekanan na vuwa', i inani mu, marengay kanazu za “ malrazam ku zanmu 'inavayan kaniyam! ” nazu na wadadiyan na zuwa mateza kana kulang, aekanan na vuwa' mukalrazam atu semangalan. na yubing nu zuwa mateza za tigami, kinger ku kani inani merengay za “ lrayuwan! ” tu kuwayaw izu na yubing, kemazu semangal na yubing.

kanta wayway peniya mu, kemazuwa ta malrazam zantu ika'iyana kanta milrayuwana ta. uniyan za kemazu za kipuavuavut kiveraveray za eman ziya za trau.

nanta ma'izangan kemay a makiteng ta ziya, tu vaawaw ta paka'izang, melremes za manueman zantu ulepan, zi nu kuwaleng ta mu, tu vangavangan kaninta mu, 'azi lra alralrupe'. nu dalikedik ta mu, nanta ma'izangan atra'alr lra tu piniangeran. nanta ma'iza'izangan kemirungetr kanta 'azi temaraulep 'azi mapapalak. nantu lramanan 'inavayan kaninta maraasavak za lrevk maraatras za zenan.

kemay kana yuciyēng(幼稚園), palru kana kuwocung(國中), kanini na muketrep 'amiyan mu, kazuwan na sinsu na pangetrengetr panadam kaninta.

na sinsu mu, tu paresanaw ta zantu alrak kemalraman mianger kaninta, inta lra mu, kemay kana uniyan ta za kinalrazam za emaeman, mau na marukezang ta lra zi dalikedik ta zi sayhu ta lra za eman ziya. kemawan ta lra kana ma'izang ta lra zi sazu ta kinasayhu mianger. inta mu, kuwaazu ta mianger zata sasungalan kana sinsu za sakuwazazu 'ami tu pinatakesiyan kaninta.

mena'u ta kana sinbung mu, i kaziyu i Siriya(敘利亞) na kanatal mu, matengangetengez zi mavuraw kiruwaday lra kanatu kanatal, zi uniyan lra za ruma' tu kaazuwan. mianger ku mu, inta na kazu kani Taiwan mu, 'azi ta mavangavang za ta aekanan za ta kakiping, zi mutulre'ay ta ikavaaw kemia mu, malrazam ta zatu ika'iyana kaninta na sēvu(政府).

marenger ta kaninta mapiyapiya ulra ta anger za malrazama ta zatu ika'iyana na trau kaninta, sasungal ta kanazu kanini na kinasamiyan tu pinulivunan pinuwalrangan mena'u kaninta nazu na kazuwazuwan na 'azi ta malrazam kanatu ngadan nazu na trau ziya.

115 年全國語文競賽臺灣原住民族語言朗讀文章 【西群卑南語（原稱：初鹿卑南語）】 國中學生組 編號 3 號

感恩

每當有人送來親自種的蔬果時，媽媽總會說「感恩！」親友會愉快的要我們好好享用；郵差送來郵件，媽媽會說「謝謝！」郵差也會滿臉笑容。生活裡的一切都需要感恩，父母撫養我們到大，恩情比海深，比山高。從幼稚園到國中有好多老師教導、關愛我們，要感激老師教育的恩惠。有國家因為戰亂，導致人民無家可歸，心裡更是感恩生在豐衣足食的寶島。希望大家能以感恩的心，感謝替我們服務的人。